

IL MANARIN TAL CÛR

Tal savoltament de vuere passade a son lâts par aiar tancj peçots, tantis moretinis e tantis scuindarolis, e a son vignudis tantis carognariis, tantis sporcjariis e tantis falsetâts, che ancje i plui grancj dordei a varessin vût di vierzi i voi. E sul in prin al pareve che une vorute di lôr ju vessin vierzûts.

Ma a son bastâts chescj cinc, sîs agns parcè che la plui part e spesseàs a tornâju a sierâ. Il talian, e ancje il furlan intalianât, al è masse tacât ai siei idui, par fermâsi a cjalâ di ce paltan che a son fats: i coste mancûl fature sierâ i voi e tornâ a butâsi in zenoglon; al à fan di peçots, di bandierinis, di galiardets, di nastrins, di patachis, di filistrins; al à sêt di peraulis, di bufulis, di mitologjiis, di sflocjis, di bausiis; al à bisugne di jessi talpinât e coionât. Tant che un vieli uciel di scjaipule, che se lu molin, al fâs une svoletade pal bearç e po al torne di bessôl inte sô pereson.

La paiaçade fassiste no à creât nuie di gnûf tal spirt dai talians: e à nome sglonfât, potenziât, sfrutât e puartât aes ultimis consequencis chês viltâts e chês tristeriis che i talians a vevin za dafonts de anime. Cui che al conservave ancje un vanzum di çurviel e di cussience al si è spaventât devant di chel spetacul stomeôs, di chês indegne camore fate in non di idealitâts cence fundament, di peraulonis cence significât, di balis cence sostanzie. Ma la plui part, dopo un moment di sturniment e je tornade tal cjôt. Tal cjôt nol plûf e ogni tant cualchidun al implene il laip! Ce covential di plui?

josef marchet - Patrie dal Friûl / setembar 1951)